

خَطِ دَوْمِ پوُلُس بَلَدِه تيموتائوس

سلام ها

۱ از طرفِ پوُلُس که دَ خاست و اِراده خُدا
و دَ مُطابِقِ وعده زِندگي اَبدي که دَ مَسِيح
عيسی پيدا مُوشه، رَسولِ مَسِيح عيسی اَسْتُم.
۲ تَقْدِيمِ دَ باچِه عَزِيزِ مِه، تيموتائوس: فَيض و
رَحْمَت و سَلامَتِي از طرفِ آتِه مَو خُدا و مَوْلای
مَو مَسِيح عيسی نَصيبِ تُو شُنه.

تَشْوِيقِ دَ وِفاداری

۳ شاو و روز خُدا ره شُکر-و-سِپاسِ مُوگُم و
دَزُو مِثَلِ بابِه کَلونای خُو قد وِجْدانِ پاك خِدْمَتِ

مُونْم و دَ دُعا های خُو هر وخت تُو ره یاد مُونْم.
 ۴ وختی آوِدیده تُو ره دَ یاد خُو میرْم، ما آرزو
 مُونْم که تُو ره بسم بِنِگَرْم تا خوشی مه کامِل
 شُنه. ۵ ما ایمانِ بے رِیای تُو ره دَ یاد خُو میرْم که
 اوّل دَ آجِه تُو لوئیس و بعد ازو دَ آبه تُو اَفنِیکی
 و جُود دَشت. و ما اِطْمینان دَرْم که امو ایمان دَز
 تُو ام و جُود دَره. ۶ امزی خاطر دَ یاد تُو میرْم که
 امو نِعمتِ خُدا ره که دَ وختِ کَشیدونِ دِستای
 مه دَ بِلِه تُو دَز تُو دَدِه شُد، دُوباره شُعلِه وَر
 کُنی. ۷ چُون روحی ره که خُدا دَز مو دَدِه،
 روحِ ترس نِبیّه، بَلکِه یگِ روحِ قُدرت، مُحَبَّت
 و خودداری اَسته. ۸ پس، از شاهِدی دَدو دَ بارِه
 مَولای مو شَرْم نَکو و از رابِطه گِرفتو قد ازمه
 که از خاطرِ شاهِدی دَدو دَ بارِه مَولا بَندی اَسْتْم،
 ام نَنگ نَکو. بَر عکس، دَ وَسِیلَه قُدرتی که خُدا
 مِیدیه قد ازمه دَ رَنجی که از خاطرِ خوشخبری
 مِیکشْم، شَرِیک شو. ۹ خُدا مو ره نِجات دَدِه و
 سُون یگِ زِندگی پاک-و-مُقَدَّس کُوی کده. ولے

ای از خاطرِ اعمالِ از مو نبُود، بلکه از خاطرِ مقصدِ خود شی و از خاطرِ فیضی که تَوْسُطِ مسیحِ عیسیٰ پیش از شروعِ دُنیا دَز مو دَدَه شُدَد. ۱۰ و آلی اُمُو فِیض دَ وَسِیْلَه ظُهُورِ نِجَاتِ دِهِنْدِه مو عیسیٰ مسیحِ بَرَمَلَا شُدَه. اُو مَرگِ رِه از مینِه باله کد و راهِ زندگی اَبَدی و نیست ناشُدنی رِه دَ وَسِیْلَه پِیغامِ خوشخبری معلومدار کد. ۱۱ و خُدا مَرِه اِنْتِخَابِ کد تاکه بلَدِه پَخْشِ کدوِنِ امزی خوشخبری اِعلانِ کُنِنْدَه، رَسُولِ و معلِمِ بَشُم. ۱۲ امزی خاطرِ پِگِ امزی رَنجِ ها رِه مِیَنگَرَم، لیکِن شَرْمِنْدَه نِیِم، چِراکه ما مِیْدَنَم که دَ کِی اِیْمَانِ اُورْدِیْم و یَقِیْنِ دَرَم اُو قُدْرَتِ دَرِه که اَمَانَتِ مَرِه تا رُوزِ اَخِرَتِ نِگَاهِ کُنَه. ۱۳ از تَعْلِیْمِ دُرُسَتِ که از مه شَنِیْدِی قَدِ اِیْمَانِ و مُحَبَّتِی که دَ مَسِیْحِ عِیْسِیٰ اَسْتَه، سَرْمَشَقِ بِگِیْر. ۱۴ اُمُو نِعْمَتِ خُوبِ که دَز تُو بَخْشِیْدَه شُد، اُو رِه دَ کُومَکِ و یاری رُوحِ اَلْقُدْسِ که دَز مو وُجُودِ دَرِه، نِگَاهِ کُو.

۱۵ تُو ازی خبر دَری که تمامِ برارو دَ ولایتِ
 آسیا^a مَره ایلَه کد، دَ شَمُولِ فِیجِلْس و
 هِرْموجِنِس. ۱۶ مَولا عِیسی رَحمتِ خُوره نَصیبِ
 خانوادِه اونِیسیفُورُس کُنَه، ازی که اُو بارها دِل
 مَره تازه کد و از بَندی شُدون مه شرمِنده نَشُد،
 ۱۷ بَلکِه دَمزُو غَیْتیکِه دَ شارِ رُوم رَسید، اُو دَ
 کوشِشِ کَلو مَره پالیدِه پَیدا کد. ۱۸ مَولا عِیسی
 دَزُو لُطف کُنَه تاکه اُو دَ روزِ قِیامت دَ حُضُورِ
 خُداوند رَحمت پَیدا کُنَه، چُون تُو خُوبتَرِ خبر دَری
 که اُو دَ شارِ اِفْسُس چی خِدْمَتای کَلو کد.

۲ ۱ پَس آی باچِه مه، تُو دَ فِیضی که دَ
 مَسیحِ عِیسی اَسْتَه، قَوی بَش. ۲ و اُمُو
 تورا ی ره که دَ حُضُورِ شاهِدونِ کَلو از مه
 شَنِیدی، دَ کسای یادِ بدی که قابِلِ اِعتبار و
 قابِلِ دَ تَعْلیمِ دَدونِ دِیگرو بَشَه.

^a ۱:۱۵ بلده معلومات دَ باره آسیا دَ فهرست لغات
 مُشکِل رُجوع کُنید.

^۳ مِثْلِ يَگِ عَسْكَرِ خُوبِ مَسِيحِ عَيْسَى دَ
 سَخْتِي هَا شَرِيكَ شُدِه تَحْمَلُ كُو. ^۴ هَيْچِ عَسْكَرِ
 خُود رِه دَ كَارَايِ عَادِي زِنْدَگِي بِنْدِ نَمُوكُنِه، بَلَكِه
 هَدَفِ شِي اَيْنَمِي اَسْتِه كِه رِضَايَتِ قَوْمَنَدَانِ خُو
 رِه حَاصِلِ كُنِه. ^۵ اَمِي رَقْمِ، وَخْتِي يَگِ وَرَزِشْكَارِ
 دَ مُسَابِقِه حِصَّه مِيگِيرِه، اَوْ نَمِيْتَنِه تَاجِ پِيروزي
 رِه حَاصِلِ كُنِه، سِوَايِ كِه اَز قَانُونِ شِي پِيروِي
 كُنِه. ^۶ دِيغُو^a كِه زَحْمَتِ كَشِيْدِه، بَايْدِ اَوَّلِيْنِ
 كَسِي بَشَه كِه حَقِ خُو رِه اَز حَاصِلَاتِ بِيگِيرِه.
^۷ دَ بِلَه اَمْزِي تَوْرِه كِه مُوگْمُ خُوبِ فِكْرِ كُو، چُونِ
 مَوْلَا تُو رِه دَانَايِي مِيْدِيَه تَاكِه هَر چِيْزِ رِه بُقَامِي.
^۸ عَيْسَى مَسِيحِ رِه دَ يَادِ خُو بِيرو كِه اَز نَسْلِ
 دَاوُودِ بُوْد. اَوْ پَسِ اَز مَرگِ دُوْبَارِه زِنْدِه شُدِ
 كِه اَيْنَمِي خُوشْخَبْرِي اَسْتِه ^۹ وَ اَز خَاطِرِ اَمْزِي
 پِيْغَامِ مَا رَنجِ-وَ-زَحْمَتِ مِيْنِگَرْمِ وَ حَتِي رَقْمِ يَگِ
 جِنَايَتْكَارِ دَ زَنْجِيْرِ اَسْتُمْ. مَگْمِ كَلَامِ خُدَا دَ زَنْجِيْرِ

^a ۲:۶ دِيغُو وَ يَا دِهْقَانِ.

بسته نموشه. ۱۰ پس پگِ امزی چیزا ره از خاطرِ
انتخاب شده های خُدا تَحْمَلِ مُونُم تا که اونا ام
صاحبِ نجات شنه، صاحبِ نجاتی که دَ مسیح
عیسی پیدا موشه قد جلالِ اَبَدی.

۱۱ اینمی توره قابلِ اعتماد آسته:

اگه مو قد مسیح مُردی، قد ازو
زندگی ام مُونی.

۱۲ اگه تَحْمَلِ کُنی، قد ازو پادشاهی
ام مُونی،

اگه اُو ره انکار کُنی، اُو ام مو
ره انکار مُونه،

۱۳ ولے اگه مو بے وَفا آستی، اُو
وفادار مُومنه،

چراکه اُو نَمیتنه خود خُو ره انکار کُنه.

مُشَخَصَاتِ خِدْمَتِگَارِ خُدا

۱۴ ای چیزا ره دَ ایماندارا یادآوری کُو و اونا ره
دَ حُضُورِ خُدا اَخْطَارِ بَدی که از بَحْث و جنجال

دَ سِرِ کَلِمَاتِ دُورِی کُنْه، چَرَاکِه ای کار هیچ
 فایده ندره، بَلْکِه فقط شِنَوِنْدَا رِه تَبَاهِ مُونِه.
 ۱۵ سَخْتِ کُوشِشِ کُو که قَابِلِ پَسَنْدِ خُدا شُنِی،
 رَقْمِ یِگِ خِدْمَتْگَارِ که هیچ دَلِیلِ بَلْدِه شَرْمِنْدَگِی
 اَزُو وُجُودِ نَدْرِه و کَلَامِ حَقِیْقَتِ رِه بَطُورِ دَقِیْقِ
 و صَحِیحِ تَعْلِیمِ مِیدِیِه. ۱۶ اَزِ کُفْتُوگُویِ پُوجِ
 و بے اَرزِشِ دُورِی کُو، چَرَاکِه مَرْدُمِ رِه کَلُوتَرِ
 طَرَفِ بے دِیْنِی مُوْبَرِه. ۱۷ تَوْرِه اَزُوا رَقْمِ مَرَضِ
 سَارِ^a اَلّی پَخْشِ مُوشِه. هِیْمِیْنائُوسِ و فِیلِیْطُسِ
 اَز جُمْلِه اَمزُو کَسَا اَسْتِه ۱۸ که اَز حَقِیْقَتِ رُوی
 گَرْدُو شُدِه و مُوگِه که «گَاهِ قِیَامَتِ شُدِه» و دَ
 ای وَسِیْلِه اِیْمَانِ بَعْضِی کَسَا رِه اَز بَیْنِ مُوْبَرِه.
 ۱۹ مِگَمِ تَادُو مَحْکَمِ رِه که خُدا اِیْشْتِه، اُسْتَوَارِ
 اَسْتِه و اِیْنِمِی کَلِمِه هَا دَزُو نَقْشِ شُدِه:
 ”خُداوَنْدِ بَنْدِه هَا یِ خُو رِه مِیْنَخْشِه.“

^a ۲:۱۷ دَ جَا یِ مَرَضِ سَارِی دَ زِیَوْنِ یُونَانِی «قَانْقَارِیَا»

نُوْشْتِه یِه.

و

”هر کسی که نامِ خداوند ره دَ زیو میره،
باید از بدی دست بکشه.“

۲۰ دَ یگ خانه کُنه علاوه از دیگ-و-کاسه
طَلایی و نُقره‌یی، پیله-و-کاسه چوبی و گلی
ام وجود دَره. بعضی ازوا بلده مقصدِ خاص
استفاده موشه و بعضی ازوا دَ ضرورتای
روزمره. ۲۱ پس اگه کسی خود ره امزو چیزای
که گُفتم پاک کُنه، اُو مثلِ ظرفی آسته که بلده
مقصدِ خاص دَ کار مییه که بلده صاحبِ خو
پاک و فایده‌مند و بلده هر کار نیک تیار آسته.
۲۲ از شهوتای که دَ دورونِ جوانی آسته دوتا
کُو و قد تمامِ کسای که از دِلِ پاک دَ پیشگاهِ
مَولا دُعا مونه، دَ دُمبالِ عدالت، ایمان، مُحَبَّت
و صلح-و-سلامتی بگردو. ۲۳ دَ بحث‌های پوچ
و جاهلانه کار نگیر، چون میدنی که ای چیزا
آخر شی جنگ-و-جدل آسته. ۲۴ لیکن خدمتگارِ
مَولا نباید جنگ-و-نزاع کُنه، بلکه باید نسبت

دَ پَگِ مَرْدُمِ مِهْرَبُو، دَ تَعْلِيمِ دَدُو قَابِلِ و دَ بَرَابِرِ
 مَرْدُمِ بَدِ، بُرْدَبَارِ و بَا حَوْصِلَه بَشَه. ^{۲۵} اُو بَايِد
 مُخَالِفَايِ خُو رَه دَ نَرْمِي اِصْلَاحِ كُنَه تَا شَايِد خُدَا
 اِجَازَه بَدِيَه كِه اُونَا تَوْبَه كَنَه و حَقِيْقَتِ رَه پِي بُبْرَه
^{۲۶} و دَ خُوْدِ اَمْدَه اَز دَامِ شَيْطُو دُوتَا كُنَه، چُون
 اُونَا بَلْدَه پُورَه كَدُونِ خَاسْتِ اَزُو اَسِيرِ بُوْدَه.

بِه خُدَايِي دَ زَمَانِ اَخِرِ

۳ مَگَمِ اِي رَه بَدَنِيْد كِه دَ رُوَزَايِ اَخِرِ اَوَقَاتِ
 تَلَخِ اَمْدَنِي اَسْتَه؛ ^۲ چُون مَرْدُمِ خُوْدِ پَرَسْتِ
 و پُولِ دُوَسْتِ، لَافَكِ و مَغْرُورِ مَوْشَه. اُونَا
 تُوْرَايِ زِشْتِ و كُفْرَاْمِيْزِ مَوْگِيَه و اَز اَيْدِ اَتَه و
 اَبَه خُو نَمُوشَه؛ اُونَا نَاشُكِرِ، نَپَاكِ، ^۳ بَه مِهْرِ،
 سَخْتِ دِلِ، چُغُولِ، نَپَرَهِيْزِگَارِ، وَحْشِي، دُشْمُونِ
 نِيكِي، ^۴ خِيَاَنْتِكَارِ، تَنْدَخُوِي و بَه پَرُوَا و پُرِ
 پُف-و-پُتَاقِ مَوْشَه و اُونَا دَ جَايِ اَزِي كِه خُدَا رَه
 دُوَسْتِ بَدَنَه، عِيَاَشِي رَه كَلُوْتَرِ دُوَسْتِ مِيْدَنَه.
^۵ ظَاهْرًا اُونَا خُوْدِ رَه دِيْنْدَارِ نِشُو مِيْدِيَه، مَگَمِ

قُدْرَتِ دِیْنَداری رِه رَد مُونِه. از اُو رِقْمِ مَرْدُم
 دُوری کُو. ۶ دَ بَیْنِ ازوا کَسای اَسْتِه کِه دَ
 چَل-و-نَیْرَنگ دَ مَنِه خانِه های مَرْدُم رِه پَیْدا
 مُونِه و خاتُونوی کَم عَقْل رِه کِه دَ تَی بَارِ گُناهِ
 خَم شُدِه و دَ زَیْرِ تَاطِیْرِ هَوَس های رِقْمِ رِقْمِ رَفْتِه، دَ
 چَنگ خُو مَیْرِه. ۷ ای رِقْمِ خاتُونو هَر وخت تَعْلِیْمِ
 نَو حَاصِلِ مُونِه، مَگَم هِیچِ وخت حَقِیْقَتِ رِه دَرکِ
 نَمِیْتَنِه. ۸ اُمُو رِقْمِیکِه «یَنْیَسِ و یَمْبَرِیْسِ»^a قَد
 مُوسِی پَیْغَمْبَرِ مُخَالَفَتِ کَد، اَمی نَفْرای چَلبازام
 مُخَالَفِ حَقِیْقَتِ اَسْتِه. فِکْرای ازوا گَنْدِه شُدِه و
 اونا از نِگَهِ اِیْمَانِ رَد شُدِه. ۹ مَگَم اونا کَلوْتَر
 ازِی پِیْشَرَفْتِ نَمُونِه، چِراکِه لَوْدَگِیِ ازوا دَ پَگِ
 مَعْلُومَدَارِ مُوشِه، اُمُو رِقْمِیکِه حَمَاقَتِ یَنْیَسِ و
 یَمْبَرِیْسِ دَ پَگِ مَعْلُومِ شُد.

^a ۳:۸ اگرچه ای دُو نام دَ عَهْدِ قَدِیْمِ ذِکْرِ نَشُدِه، لَیْکِن
 اِمکانِ دَرِه کِه یَنْیَسِ و یَمْبَرِیْسِ جادُوگرای فِرْعَوْنِ بُوْدِه
 بَشِه، کِه کارای جادُوگرای خُو رِه دَ خِلافِ مُوسِی پَیْغَمْبَرِ
 اِنجام مِیْدَد.

۱۰ لیکن تُو از تعلیم، رفتار، هدَف، ایمان،
 صبر و حوصله، مُحَبَّت و بُردباری از مه سرمشق
 گرفته ۱۱ و از آزارها و رنج های که دَ
 شارای اَنطَاقیه، قونیه و لِستره دیدم، خبر
 آستی و میدنی که چی زجرها ره دَ اُونجی
 کشیدم، ولے مولا عیسیٰ مره از پگ شی
 خلاص کد. ۱۲ دَ حقیقت، تمام کسای که
 میخایه دَ راهِ مسیح عیسیٰ دَ دینداری زندگی
 کنه، رنج-و-آزار ره مینگره. ۱۳ لیکن مردمای
 شریر و مکار از بد بدتر موشه. اونا دیگر و ره
 بازی میدیه و خودون شی ام بازی موخوره.
 ۱۴ مگم تُو دمزو چیزای که یاد گرفتی و ایمان
 اوردی اُستوار بُمَن، چُون تُو میدنی که اونا ره از
 کی یاد گرفتی؛ ۱۵ و ازی که تُو از ریزگی قد
 کتابِ مُقَدَّس آشنا بودی، اُو میتنه دَز تُو حکمت
 بدیه تا دَ وسیله ایمان دَ عیسیٰ مسیح نجات
 پیدا کنی. ۱۶ تمام نوشته های مُقَدَّس از جانبِ
 خُدا اِلْهَام شُده و بَلَدَه تعلیم، سرزنش، اِصلاح

و تَرْبِيه دَ رَاهِ عَدَالَتِ فَايِدَه‌مِنْدِ اَسْتَه، ۱۷ تاکه
بِنْدَه خُدا بَلْدَه هِر کَارِ نِيکِ کَامِلًا آمَادَه-و-مُجَهَز
بَشَه.

اهمیتِ کلامِ خُدا

۴ دَ حُضُورِ خُدا و مَسِيحِ عِيسَى که دَ بِلَه
زِنْدَه هَا و مُرْدَه هَا قِضَاوَتِ مُونَه، ما از
خَاطِرِ ظُهُورِ و پادشاهی ازو تُو ره اینی رقم
قَسَمِ مِیْدَم: ۲ از کلامِ وَعَظِ کُو و بَلْدَه امزی
کار وخت و ناوخت تیار بَش؛ قد صَبِر-و-حَوَصِلَه
کَلو و تَعْلِيمِ دَقِيقِ، دِیگَر و ره سِرزَنَش، مِلَامَتِ
و نَصِيحَتِ کُو.

۳ چُونِ زَمَانِی مِییه که مَرْدُمِ تَعْلِيمِ دُرُسْتِ ره
بَرَدَاشْتِ نَمُونَه، بَلکِه دَ مُطَابِقِ خَاهِشایِ خُودونِ
خُو اُونَا بَلْدَه خُو مَعْلِمایِ غَدَرِ گِرِفْتَه جَمِ مُونَه تا
چِیزایِ ره بَشَنَوَه که گوشایِ ازوا خَاهِشِ شَنِیدونِ
شی ره دَرَه. ۴ پَسِ اُونَا از شَنِیدونِ حَقِيقَتِ رُویِ
خُو ره دَوَرِ مِیْدیه و دَ پِشْتِ اَوَسَانَه‌ها گِشْتَه گَمراه

مُوشه. ^۵ مگم تُو دَ تمامِ حالاتِ هُوشیار و بیدار
بُوده بَلدِه تَحْمَلِ رَنجِ تیارِ بَش. دَ اِعلانِ کدُونِ
خوشخبریِ خودِ ره مِصْرُوفِ کده وِظیفِه خُو ره
پُوره کُو.

^۶ چُونِ وختِ قُرْبانِی شُدونِ مه رَسیده و زمانِ
رفتونِ مه ازی دُنیا نَزْدِیکِ شُدِه. ^۷ ما دَ مُسابقِه
نیکو کوششِ خُو ره کُدْم و دَوْرِه خُو ره پُوره
کده ایمانِ خُو ره نِگاهِ کُدْم. ^۸ و بعدِ ازی تاجِ
عدالتِ دَ اِنْتِظارِ مه یِه، اُمُو تاجِ که مَولا یعنی
قاضیِ عادِلِ دَ روزِ قیامتِ دَزِ مه مَویَخْشِه. و
اُو ره نَه تَنها دَزِ مه مِیدیه، بَلکِه دَ پِگِ کسایِ
که شَوَق-و-اِنْتِظارِ ظُهُورِ اَزو ره دَرِه.

نصیحت های شخصی پولس

^۹ سخت کوششِ کُو که هر چی زودتر دَ دِیرِ
ازمه بییی، ^{۱۰} چراکه دیماس مَرِه ایله کد و
از خاطرِ دوستی و دِلْبَسْتِگیِ دَ ای دُنیا دَ
شارِ تِسالونیکِی رفت. کریسکیس دَ منطِقِه

غلاتیه و تیتس دَ منطقه دَلماطیه رفته. ^{۱۱} تنها
 لوقا قد ازمه یه. مرقس ره گرفته قد خود
 خو بیرو، چون او بلده خدمت دَز مه فایده‌مند
 آسته. ^{۱۲} تیخیکاس ره دَ شارِ اِفِسُس رَبی کدَم.
^{۱۳} دَ وختِ اَمَدو چَپَن مَره که دَ شارِ تروآس پیشِ
 کَرپُس ایشتم و امچنان کتابا ره و از پگ کده
 مَهَمتر نُسَخه های پوستی^a ره قد خو گرفته
 بیرو. ^{۱۴} سِکندرِ مِسگر دَز مه کلو ضرر رَسند.
 مولا دَ مُطابقِ اعمالِ شی دَزو جزا بدیه. ^{۱۵} تو ام
 ازو احتیاط کو، چراکه قد پیغامِ ازمو سخت
 مُخالفَت کد. ^{۱۶} دَ اولین محاکمه مه، هیچ کس
 قد ازمه یاری نکد، بلکه تمام شی مَره ایله کد.
 خدا ای ره دَ حساب ازوا نگیره. ^{۱۷} مگم مولا
 یارِ ازمه بود و دَز مه قُدرت دَد تاکه تمام پیغام
 تَوَسُطِ ازمه اعلان شنه و پگِ مِلَّتِ های غَیرِ

^a ۱۳:۴ دَ زمانِ قدیمِ کتابِ مُقدَّسِ اکثرِ وختا دَ نُسَخه
 های پوستی نوشته موشد.

یهُود اُو ره بِشَنَوَه. و ما از دانِ شیر ام خلاص
 شُدَم. ۱۸ اَرے، مَولا مَره از هر کارِ شَیطانی
 خلاص مونه و مَره دَ سَلامَتی دَ مَلَکُوتِ آسمانی
 خُو مِیرِسنه. بزرگی-و-جلال تا اَبَدُالْاَباد از و باد.
 آمین.

۱۹ دَ پَرِسَکِلا و اَکِیلا و دَ خانوادِه اونیسِیفورُس
 سلام بِرِسن. ۲۰ اِراستوس دَ شارِ قَرِنْتُس مند
 و تروفِیموس ره دَ شارِ مِیلِیْتُس ایشْتُم، چراکه
 مریض بُود. ۲۱ سخت کوشش کُو که پیش از
 زِمِستو بییی؛ اِفبُولُس، پُودِس، لِنوس، کلاودیه
 و پگِ برارو تُو ره سلام مُوگه. ۲۲ مَولا عِیسی
 قد روحِ تُو بَشَه. فیض و سَلامَتی نَصیبِ پگ
 شُمو شَنه. آمین.